

左恪靖侯奏稿續編

恪靖奏稿續編卷二十五目錄

遵查劉松山各情覆陳摺

劉松山續獲大捷摺

各軍剿擒獲勝摺

郭寶昌毋庸新聞山西片

南路官軍疊斬逆裔摺

北路官軍收復雲州攻克堅寨摺

知州尹泗等死事情情形片

陳明進駐平涼片

易德麟病故請卹片

令周開錫總統秦州各軍摺

遵查劉松山各情覆陳摺

奏爲遵

旨覆陳仰祈

聖鑒事竊臣於同治八年九月十二日欽奉九月初六

日

諭旨定安等奏降回變亂靈州失守一摺本日據神機營王大臣奏接據定安函稱探聞劉松山一軍行抵靈州城北駐紮不分良莠肆行殺戮以致降回疑懼陷城搶糧等語著將起衅情形查明具

奏不得稍涉回護等因欽此並續奉

諭旨飭查臣維劉松山一軍於八月初二日進抵靈州

是夜據靈州知州及該州已撫回目周斌詣營面稟陝
回自敗竄靈境後占踞甘回莊宅甘回畏其悍不敢較
劉松山以甘回既久經受撫自宜示以區別當面諭周
斌密傳甘回安分自保並令自左肩至右脇斜繫草繩
傳諭各營毋得濫殺飛札馬化澂傳知各寨堡毋稍驚
疑一面出示曉諭并飭周斌選派甘回十餘人陣前傳
示所過各回堡俾咸知官軍祇剿陝回已撫之甘回安

居無恐初三日劉松山由靈州進兵郭家橋沿途各撫
回堡寨竟敢施放鎗炮傍堡列隊大呼喊殺官軍勇丁
受傷者六十餘名劉松山猶恐愚民無知置之不理初
四日各寨堡紛紛出隊挑戰劉松山猶恐馬化澂尙未
傳到或係甘回驚疑仍按兵不動又出示曉諭免勦初
五日廿回各堡寨復列隊近營施放鎗礮比官軍出隊
仍歸寨內初六日列隊撲犯官軍營壘劉松山始出隊
擊之其一切情形臣曾於八月二十九日摺內詳敘九
月二十日接到劉松山報八月初七至十二日五獲大

勝公牘內敘及十二日據靈州逃出勇丁洪得勝稟稱
靈州城內甘回將城門關閉亂殺漢民前派去護餉之
總兵銜副將謝榮華陳永錫及續派去靈州買糧之提
督曹加正總兵銜副將陳明遂副將張福星彭友亮張
紹祿王榮華及勇丁七名均不知下落臣詳閱來牘於
州城文武曾否遇害未據敘及卽護餉買糧各員弁勇
丁亦無確實下落未便據以入

告且據劉松山緘稱馬化澂以官軍迅進下橋據永甯
州要害之地故喉靈州甘回劫我餉銀截我後路意圖

掣官軍回援可乘勢奪踞下橋要津而專兩渠之險暫宜置之不理臣比令將靈州曾否失陷文武員弁如何下落知州鍾牧是何名詳細開報以憑入

奏尙未接其覆牘頃又據道員曾傳理緘告得劉松山十月初六日信九月二十三日攻克劉家寨西北七寨二十九日克復靈州城池並破城外四寨一壘十月初二日攻克營東十餘里里仁渠一帶大小九寨其公牘由環縣一帶繞遞均尙未到蓋環慶山谷盤互殘破以來千里白骨黃沙人烟闕寂文報難通也此後各軍齊

近聲息相接或可附便馳遞臣竊維馬化澁之陰賊險
很天下共知自就撫後築寨修堡購馬造械仍與陝回
互相首尾陝回敗則資以馬械陝回窮則助以軍糧從
前屢見章奏自甯靈西達西甯南通河狄各回民無不
仰其鼻息穆圖善曾令招撫西甯河州諸回迄不之應
且常陝所部掠蒙古藩部定安所訊據活賊白天才之
供劉松山自花馬池南下時曾擊敗飽掠回巢韋州蘇
光棍之黨事皆在八月以前是時官軍未抵下橋也其
變果誰激之言者所稱濫殺激變自是指八月初三日

郭家橋初次大捷而言馬化澂入月初四日所上臣稟
於劉松山軍抵何處且一字不題豈果有濫殺激變之
事而反爲諱之乎白彥虎禹得彥楊文治諸逆首之突
犯固原州實馬化澂嘆其黨馬萬春率之以來豈亦由
固原各軍激之而然乎甘肅之民漢回雜處昔本漢多
於回近則回多於漢若甯靈一帶周數百里則漢民幾
無遺類固原州一城回民北徙後漢民存者不過十數
靈州一城漢民存者不過數家其產業婦女均歸金積
堡老弱死亡壯丁爲其傭工細履漢民之痛心疾首抑

又何怪其然臣接靈州紳民之稟聳惕不安頗慮失茲
不圖張駿元臭之患必見諸異日臣此時扶同徇飾欺
已以負

皇上異日蒙

旨詰責死有餘辜至劉松山爲人忠勇而明方畧當時
諸將實罕其比卽如此次諸大捷正奇迭用他人得其
一已爲奇功而所陳戰狀語語切實絕少矜張亦可概
見臣與曾國藩議論時有不合至於識拔劉松山於凡
眾中信任最專其謀

國之忠知人之明非臣所及上年曾舉以入

告矣臣於劉松山雖有心愛護思爲

國家保此將才然事關大局如劉松山實有濫殺激變
之事咎有攸歸臣再代爲庇護自蹈欺罔之咎臣雖至
愚極陋不敢出此此區區微忱所求諒於

君父而不敢必者也自來辦賊之法剿撫兼施然同性
犬羊知畏威而不知懷德辦理次第與他賊正有不同
辦他賊先剿後撫辦回則必以撫爲先蓋回之所藉爲
亂端者漢與回有異視也非宣布

朝廷德意分夏匪不分漢回則賊有詞以脅其黨眾將
剿不勝剿然若壹於主撫賊必以撫愚我陰集其黨眾
蠶食漢民又將撫不可撫竊恐漸漬既久勢不至如雲
南撫回爲回所制不止臣前疏所言攻心爲上者竊以
爲大局雖終歸於撫然非俟其畏剿之極誠心乞撫則
固未可漫然允之現仍飭各軍前進一切剿撫機宜必
俟劉松山察酌實局而後會同穆圖善核奏斷不敢草
率從事致貽陝甘異日之憂亦不敢鹵莽相將致傷
皇上如天之德所有辦理情形謹據實覆陳伏乞

皇太后

皇上聖鑒訓示施行謹

奏

同治八年十月十九日

劉松山續獲大捷摺

奏爲劉松山全軍續獲大捷據實馳報仰祈

聖鑒事竊劉松山一軍八月初七日起二十八日止節次大捷情形臣已於九月二十五日馳報茲據劉松山報八月二十八日夜擒獲賊探訊據供稱吳忠堡北二里許顧家寨馬家寨踞賊本陝回白彥虎黨夥因屢敗

膽寒約今夜四鼓移向寨後而以陝回崔三所部賊黨
填踞額馬兩寨劉松山遣人往探一面傳令步軍整隊
以待四鼓前探飛報寨內火光漸出寨外火光亦漸近
劉松山以兩寨相距不過數十丈飭各營分兩路向兩
寨左右進一向兩寨之中進自率各營旗相機策應並
分布左右兩支稍取遠勢以拒各堡援賊兩堡逸賊戒
諸軍非近賊不開鎗呼殺比抵兩寨前見賊方出入互
雜尙不知官軍已到也官軍擂鼓發號提督何作霖朱
德開從中路衝入各路鎗砲齊施寨內外之賊均震懼

失措人號馬嘶自相蹂藉道員劉錦棠提督蕭章開乘
寨門未閉揮軍直入顧家寨馬家寨內外各賊殲斃殆
盡其顧家寨南小顧家寨內賊亦忙亂五品軍功董福
祥馳報劉松山立督各營分兩路抄擊提督易致中乘
勢破其外卡堆薪焚寨門提督譚拔萃軍功董福祥越
壕而入堡上磚石雨下壯士肉薄而登適寨門焚穿各
軍齊入寨內賊約四五百名無得脫者天明收隊留同
知直隸州知州李樹棠一營分駐兩寨其小顧家寨則
舉火焚之計是戰破回寨三座斃悍賊一千二百餘名

生擒一百四十餘名內賊目毛遂生郭得貴李阿滿訊
畢斬之獲騾驢戰馬八百餘匹官軍員弁勇丁陣亡者
二十六名哨官受傷者六員弁丁受刀子礮子傷者五
十一名受礮石傷者七十二名此八月二十九名大獲
勝仗情形也是日酉刻馬化澣遭人款營賁臣所批就
近稟請劉松山雷正綰察看陝回就撫誠僞一件並咨
劉松山公文一件馬化澣並稟劉松山停兵待其勸導
陝回聽候核辦劉松山許之令其呈繳戰馬軍械九月
初三日馬化澣稟已諭令各陝回確具冊結懇定呈繳

馬械章程力請移軍吳忠堡界外劉松山飭將馬械悉數呈繳再議初五日馬化澂呈遞陝回陳林禹得彥馬鎮和崔巍等稟結懇轉稟臣暫緩進剿劉松山仍令將馬械悉數呈繳再議初七日馬化澂稟繳擡鎗十桿小鎗十五桿瘦馬二十匹并解米糧一萬七千斤稟中於甘回就撫與否一語不及劉松山知其詐嚴批申飭勤限兩日悉繳馬械初九日有遊擊胡如東巡檢李廷光來營同稱陝回又繳擡鎗五十桿馬五十匹存馬化澂處卽解送大營其餘馬械必俟官軍退紮橫城方可呈

繳劉松山不准飭胡如東李廷光歸語馬化澂仍刻日
呈繳初十一兩日馬化澂並不稟覆而賊馬四竄似
覘官軍動靜者兩夜賊中修寨掘壕如恐不及十二日
胡如東李廷光復來營申前請劉松山不應詢胡如東
則穆圖善所委催糧者李廷光則曾被馬鎮和所脅者
劉松山知爲馬化澂央託而來飭仍語馬化澂將求撫
真僞情形據實稟覆然固知求撫之非誠也十三日劉
松山親帶馬步隊伍赴余家湖察看賊壕縱營夫四出
割草試賊動靜午刻金積堡馬賊蜂擁而來吳忠堡亦

相繼出隊似誤以營夫爲官軍意圖抄截劉松山飭營夫回營官軍列隊急調老營出隊策應騎賊欺官軍隊伍頗單結隊數十團冒死衝突步賊傍敬家莊兩堡排列劉松山令各隊猛撲之斃賊多名賊退兩堡旁開鎗死拒正廩戰間適老營隊伍馳至劉松山立飭蕭章開湯彥和李雲貴劉錦棠尹興茂譚拔萃喻執益等率所部從堡右抄出並防西南來援之賊飭朱德開李就山李樹棠等向堡北進飭董福祥兩營分附左右馬隊之後繼進賊見大隊齊至立即驚潰蕭章開劉錦棠留營

分兩路防援賊各率所部奮威衝殺斃賊甚多有步賊
二三百收由原路回堡劉松山麾軍截擊盡殲之乘勢
縱火橫燒堡門各營將士紛由堡之四面猱騰而上連
克兩堡堡中賊無一漏網計是戰共斃陝甘各回八九
百名生擒一百三十八名內有賊目馬阿忻馬光發一
併正法軍前奪獲戰馬騾驢三百八十餘匹拾取鎗礮
刀矛無數官軍陣亡員弁勇丁十九名受傷九十七名
此九月十三日大獲勝仗情形也賊之連夜修寨掘壕
也意圖引秦渠之水灌官軍營壘兼爲守堡計十四日

五鼓賊於吳忠堡南決開秦渠逼水東流辰初吳忠堡
東南一帶平陸成川賊仍併力加土修壩劉松山飭何
作霖譚拔萃周國勝由左路直攻壩西賊壘飭席大成
易致中相機策應飭蕭章開湯彥和李雲貴劉錦棠尹
興茂譚拔萃喻執益董福祥張俊由右路分兩支進飭
朱德開李就山李樹棠相機策應飭潘運璋陳宗蕃彭
緒忻譚上連率馬隊四營由右路之右進防吳忠堡以
北援賊並飭各營如賊不過水漫溝則勿深進也迨各
營進逼賊壘半里逆賊竟憑壘抗拒官軍奮刀進攻忽

西北騎賊約一二千飛奔來援衝過水漫溝蕭章開劉
錦棠若無所見仍攻壘如故火器環施雷轟電掣壘賊
不能支棄壘鼠竄官軍乘勢將水漫溝壩頭決開大溜
西趨蕭章聞劉錦棠急督馬步各營擊之賊向溝西潰
走被水衝斷殿後騎賊二三百名折而北趨又爲馬隊
截阻悉逼溺急溜中無得免者蕭章聞劉錦棠見溝東
一寨水淹堡脚吸溜甚急乘勢撲之寨中賊恟懼無措
遂麾所部掘堡脚劈寨門立將溝東賊寨攻破是戰破
壘決壩其殺悍賊六百有奇生擒七十四名立于斬決

奪獲騾馬一百四十餘匹軍械無算官軍陣亡員弁勇
丁十一名受傷者五十六名此九月十四日大獲勝仗
情形也十六日午後水勢漸消各堡之賊仍加掘長壕
是夜劉松山傳令各營攜鋤鍤草束三鼓出隊向水漫
溝取齊馬步五路後仍布壘陣銜枚而進距溝半里賊
始驚覺憑壕開鎗絡繹奔赴是時月明如晝官軍五路
齊撲賊不能支一面擲草掘土平壕壘進賊向西路劉
家寨王家寨陳家寨縮退劉松山令馬軍列隊勿前飭
步軍踰溝猛躡之賊因官軍追急未及入寨紛紛撲壕

官軍乘勢掩殺之。截斃溺斃者。頃刻屍積壕塹。將士卽籍賊屍躍過其蕭章。開劉錦棠所部兩支已抄出賊後。賊無路可逃。有退入堡中者。有縋牆而上者。官軍迅卽奪門而入。同時將三寨攻破。寨內外賊斬殺淨盡。劉松山隨飭董福祥張俊留所部分守之急。督所部進攻王家莊梁家莊兩堡。又克之。天明收隊計是役連破堅寨五座。斃賊實一千五百餘名。除陳家寨回目陳添玉王家寨回目馬合義於兵到時逸出外。其餘三寨頭目馬大舉馬奮剛哈得招均經陣斬。生擒逆回一百一十餘。

名陣前正法奪獲騾驢戰馬七百餘匹牛羊數百頭各
營員弁勇丁陣亡二十二名受傷者一百四十三名此
九月十六夜蕩平賊壕賊寨大勝情形也劉松山軍糧
均自河西採購由集昇堡轉般至營自賊決秦渠河水
倒漾余家湖運道須繞由西北行走而王家高樓張家
灘各回堡適當其衝十八夜劉松山飭各營裏糧聽令
弁多攜鋤鍤四鼓出隊向王家高樓比相距半里許賊
已驚覺宵柝乍停礮聲頓起各營齊隊撲之堡中礮石
如雨而人聲喧雜殊常劉錦棠乘勢猛攻一面填壕孫

騰而上賊開北門逃竄馬步各營分途掩殺逸出者無幾劉松山卽令李就山帶所部前旗入據該寨仍親督馬步各營向張家灘北進行八里天色已明見張家灘兩寨並峙寨西三里許爲朱家寨遂令分支進攻察看寨東寨西野潦縱橫不便布陣乃飭各營以次魚貫而行比近堡前礮石飛注如雨壯士躍壕以火器仰攻或積薪焚門或揮鋤掘堡前者帶傷後者繼進賊漸不支是時朱家寨回堡見劉錦棠蕭章開大隊猛進卽啟西門向于家寨而遁劉錦棠蕭章開乘勢掩殺徑抵于家

寨寨中路賊亦相率西竄劉錦棠蕭章開急麾馬隊左
右抄截步隊從中路緊追賊無可逃盡由湖水溝亮水
而過水深溜急三寨之賊得登彼岸者不過百數十人
而已惟張家灘兩寨賊眾因官軍圍攻甚緊無路可逃
拚死堅守至巳初乃破堡而入堡內之賊無一漏網劉
松山以此五寨爲北路糧運所必經飭馬隊分守俟所
調花定後路四營至再以步隊更替填紮步隊收回老
營計是戰破六寨一壘殺斃淹斃回逆計一千七百餘
名生擒二百一十三名其張家寨回目馬得貴則於堡

破時訊明生擒斬決餘賊一併正法軍前奪獲騾馬四百餘匹礮械千餘件官軍陣亡員弁勇丁十六名受傷八十六名此九月十九日攻破寨壘大勝情形也十七日有人陷金積堡之山西湖北各省漢民來營具保馬化澂永無反覆狀劉松山閱其稟詞於甘回呈繳馬械及陝回投誠事並無一語敘及引誘其故據稱伊等從前在金積堡貿易被陷茲馬化澂扣其眷屬逼令來營具保委非所願詢以馬化澂是否甘心投誠甘回是否俯首帖伏則僉云不能知也劉松山嚴飭之十九日復

破王家高樓張家灘一帶六寨一壘老賊膽寒益可想見以理勢論之陝回旣去金積堡賊勢已孤又經官軍連次痛剿其迫而求撫固在意中惟馬化澂狃於從前未受懲創仍肆狡謀其求撫也僅以陝回爲詞自居勸導之名一若未嘗同預逆謀者所呈繳之馬械又係派各甘回擇其疲朽不堪者呈繳希圖狡賴如果代陝回求撫豈有代匿馬械陰縱其逃之理如果甘心悔罪豈有陰藏馬械留爲後圖之理姑勿論指嗾陝甘各回力抗官軍罪狀昭著也現在賊勢衰微而官軍四集劉松

山已調花馬池定邊留駐之四營前往合隊記名副都
統全福所帶吉林馬隊因全福難患甚劇委記名副都
統雙壽代領西行其金運昌所統卓勝軍馬步均已行
抵花馬池是甘肅北路局勢尙期穩固差堪仰慰

聖懷至所有疊次陣亡之補用副將李洪吉補用參將
李明發李恒楚補用游擊李三元補用都司易其友鍾
錦棠陳志林拔補守備陳炳煒袁洪輝徐玉武李華富
張桂馥丁楚賢拔補千總劉友文拔補把總潘宗德龍
桂益劉貴發均係衝鋒奪卞血戰捐軀應請

旨交部照所保官階從優議給

卹典以慰忠魂而昭激勸所有劉松山一軍自八月二十九日至九月十九日續破寨壘連獲大捷實在情形謹會同幫辦陝甘軍務署陝西巡撫臣劉典馳報伏乞皇太后

皇上聖鑒訓示施行謹

奏同治八年十月十九日

各軍剿回獲勝摺

奏爲各軍剿回獲勝現籌辦理情形仰祈

聖鑒事竊陝回西竄叠經各軍截剿九月十八日以前
戰狀業經臣於九月三十日馳報其時二品頂戴按察
使銜陝西陝安道黃鼎於打拉城克獲大捷調知向西
南敗竄之賊所賸不過二千餘人馬械糧食拋棄大半
不復成隊由百草園郭城驛一帶竄走圖與前竄之禹
得彥等合股黃鼎本擬派隊窮追旋探剿敗之賊馬鎮
和陳林等股尙在新堡子收集衝散賊屬慮其糾集爲
患仍擬乘勝剿之二十一日五鼓督隊東趨天明抵王
家井溝見騎賊數百往來馳騁似窺探追軍者追見官

軍旗幟微露迹卽掣隊狂奔黃鼎令步隊居中馬隊張左右翼前進賊伏南北兩山中見官軍整隊猛進自量不支向東敗走各營躡至新堡子山徑開豁地平如掌馬鎮和陳林等列隊抗拒官軍奮威衝殺立斃悍賊數十名賊卽奔潰記名提督張會元留陝補用副將崇志及黃鼎所部馬隊兩營追殺十餘里斃賊百餘名步隊接斬兩山及新堡子街內外之賊約數百名計共斃賊六七百名拔出被裹漢回千餘名奪獲騾馬百餘頭訊據難民供稱十八日之敗顏阿洪九社營老野阿洪擺

萬馬生彥馬鎮和各股死傷大半惟陳林馬長順在後
聞前股大敗遂便縮退俾免賊首白彥虎實已於西安
堡伏誅打拉城之敗藍九阿洪亦經官軍陣斬藍九阿
洪者陝回素所崇信者也陳林馬鎮和等敗蹙之餘仍
圖折回金積堡是時陝西提督雷正綰聞陳林馬鎮和
等有回竄之信率所部由半箇城向長流水地方截之
二十三日行至何家口遇騎賊數百擊敗之遙見長流
水一帶炊煙大起知賊屯踞此間二十四日整隊前進
適賊正擊脊紛逃雷正綰率隊衝殺斃悍賊二三百名

賊向四百戶地方竄去二十五日提督周蘭亭率所部
馳至當卽會隊追剿冒雪疾馳沿途接斬甚眾追至黃
河邊上橋地方探報甘回李應春率賊十餘自西路橫
截而東勢出官軍之後雷正綰周蘭亭卽掣隊分途截
剿行過北口與賊遇兩軍夾擊斃賊約數百名又追至
石家溝斬賊百餘是夜駐石家口二十六日仍整隊追
剿行五十里抵馬家河陳林馬鎮和等逆知道追軍將至
先將輜重眷屬送往金積堡自率悍賊二三千殿後拒
官軍雷正綰周蘭亭結方陣擊之賊不能支紛紛潰走

官軍馬步緊追二十餘里，瞭見賊之輜重，家小在前，逆賊復回戈返鬥。官軍奮威衝殺，斃賊數百名，奪獲戰馬、駝騾數百匹，軍械無算。薄暮收隊，馬家河灣自半箇城迤北一片沙漠，水草均乏。官軍糧盡，引還。此雷正綰、周蘭亭截剿陝回及甘回獲勝情形也。西竄之崔禹等逆臣原調升州提督徐占彪步隊三營記名提督楊世俊馬隊四營由靜甯州出會甯安定之間相機截剿。九月十七日，徐占彪由靜甯拔隊啓行，忽接會甯縣官紳稟報前次勦敗土匪張貴侯得應等逃至會甯，又囑聚匪。

黨攻掠會甯北川十四五日攻破岳家等堡寨六處勢
復披猖請兵速剿十九日徐占彪馳抵會甯二十日黎
明出賊不意率所部兩路擊之斃匪百餘名張貴率匪
黨伏地乞撫徐占彪率所部押令回靜甯點驗分別遣
散二十三日楊世俊馳抵會甯調知陝回經官軍擊敗
後由會甯之城郭驛紅堡子等處紛紛西竄楊世俊於
二十四日五鼓由乾溝驛繞出牛馬墩遇賊騎千餘護
眷鼠走楊世俊督馬隊兩旗掩擊立斃悍賊數名兩旗
左右抄出賊益不支追至馬家堡沿途斬馘甚眾就地

安營二十六日躡追至巉口斬殿後悍賊八十餘名生擒九名奪戰馬二十餘匹賊之老幼婦女墮崖死者無數急催徐占彪步隊赴巉口會合以便縱擊二十九日楊世俊率馬隊抵車道嶺探知賊將眷屬輜重移紫漫窪站灘一帶而悍賊則紮甘草店大營川以拒追軍初一日徐占彪率所部步隊至巉口卽於是夜五更合隊齊由車道嶺出甘草店賊列隊死拒官軍官軍整隊衝殺賊仍敗走追至大營川收隊初三日黎明楊世俊徐占彪率馬步仍分三路追至高崖先後逃竄之賊均已

麇聚於此徐占彪飭步軍結成方陣楊世俊飭馬隊張
左右翼擊之斃悍賊百餘賊敗走步軍滾隊緊逼馬隊
左右斜抄賊勢不支紛由水家坡新營兩路敗走漫窪
官軍蹙之陣斬三百餘名及抵站灘地勢狹隘羣賊擁
擠不前憑卡死鬥官軍亦不能施展楊世俊令所部下
馬開鎗刀矛手從卡旁搶上徐占彪由兩山覓徑抄出
立斃悍賊五六百名歷追至距狄道州四十餘里之漫
窪十入盤始收隊而回計連日截勦殺斃悍回千數百
名奪獲戰馬騾驢千餘頭拔出漢回難民數百名此楊

世俊徐占彪等馬步七營獲勝情形也初四日黃鼎率所部馬步各營及張會元崇志等馬隊馳至則賊已由狄道向河州竄去黃鼎以臣前檄先顧蘭垣再進剿河州之賊現在中路南路赴省驛道疏通蘭垣局勢自固稟以楊世俊馬隊四營紮安定以兩營紮紅土窰徐占彪步隊兩營輔之以通蘭垣之氣擬以步隊七營紮會甯張會元崇志馬隊暫紮靜甯西數十里地方就水草黃鼎暫赴靜甯點驗張貴降眾分別辦理事定聽調臣擬令其事定後先赴蘭垣附近擇要安營俟北路局勢

畧定臣再相機調遣規復河州已發銀二萬兩交藩司
崇保令其採購軍糧矣以現在局勢論之陝回被剿悉
數西趨惟九月十八日打拉城大捷後陳林馬鎮和等
敗殘餘逆復折而東竄又經黃鼎躡追雷正綰迎剿所
賸能戰之賊不過二千餘老幼婦女則漫山遍野不知
其數十月初四日遞稟赴道員曾傳理處據稱已由馬
化澂轉稟劉松山先繳馬械一半乞降詞甚哀切臣接
馬化澂初六日稟亦同惟諛稱不知是否誠實臣察其
情詞則窮蹙乞撫本無可疑馬化澂故意顛倒以飾其

前此之詐耳曾傳理當飭聽劉松山批示而雷正綰周
蘭亭兩軍已於初六日出四百戶進擬駐黃渠橋邊逼
之簡敬臨張福齋亦於初六日進駐韋州堡與劉松山
會商辦理其甘回頭目馬化澂之黨馬萬春馬中海李
應春等均紛赴曾傳理處求撫良回李百寬丁化鵬穆
進善等則爲官軍代購糧料遞送文書惟恐弗及臣飭
曾傳理一律安撫以昭分別至陝回自鹽茶廳逃竄經
官軍衝散後老弱婦女號啼四散凍餒難堪現經曾傳
理飭各良回認保收養已不下萬數千口俟事定乃能

分地安插也所有各軍剿回獲勝辦理情形謹會同署
陝甘督臣穆圖善幫辦陝甘軍務署陝西撫臣劉典合
詞馳陳伏乞

皇太后

皇上聖鑒訓示施行謹

奏

同治八年十月十九日

郭寶昌無庸折回山西片

再正拜摺間欽奉

寄諭金順奏會師南進大獲仗並請飭郭寶昌黃鼎等

軍前進各摺片此次金順等會師南進連獲勝仗逼紮老巢洵足以寒賊膽前有旨令郭寶昌前赴山西歸李宗義調遣左宗棠諒遵旨辦理黃鼎雷正綰等在打拉城一帶剿賊現正得手能否抽赴北路著左宗棠斟酌調撥至金運昌一軍打仗尙屬得力該大臣卽令該提督率隊前進會同劉松山一軍與金順張曜派出各軍相機夾擊以壯聲援疊據左宗棠奏稱甯靈一帶已無陝回蹤跡茲覽金順所陳大股陝回麇集甯屬東西兩岸唐漢兩渠并被挖斷各情與左宗棠奏報不符此時

甯靈界內究竟有無陝回抑係甘回滋擾均著該大臣
詳細查明據實具奏欽此臣維金順張曜所剿之納由
關等處賊巢在甯夏府城南四十餘里納萬元本是甘
回所稱糾合陝回各股何股何人無從查悉自固原李
旺堡大捷後韋州預望半箇城陝回悉數由鹽茶廳西
甯其甯靈交界之黃河南岸甯安四百戶等各堡所踞
陝回悉數由長流水出打拉城一帶西南竄與之會合
馬德順黃鼎九月十六日西安堡以西之捷所剿是由
鹽茶廳西竄各大股陝回則餘之賊現入河州黃鼎等

九月十八日打拉城以北之捷所剿是由甯安堡四百戶西南竄各大股陝回打拉城去甯靈約五六百里賊悉數挈眷而遁故臣九月二十五日摺報甯夏已無回蹤九月三十日摺報甯靈已無陝回蹤跡也賊自打拉大敗後折回新堡子又經黃鼎擊敗陝回頭目陳林馬鎮和等逆星夜竄回金積堡二十五六等日雷正綰周蘭亭敗之馬家河灣東北一帶臣前奏甯靈已無陝回蹤跡其時不知陳林馬鎮和等逆敗後復又折回也現飭雷正綰周蘭亭等進剿陳林馬鎮和等逆已由馬化

薩轉稟劉松山乞撫尙未據劉松山報到金順張曜此
次所報勝仗似係九月二十五六日以前之事如在九
月二十五六日以後則所稱陝回各股當卽由新堡子
折回之陳林馬鎮和余彥祿等股金順張曜所剿之納
中開在黃河北岸雷正綰周蘭亭所駐之馬家河灣在
黃河南岸相距約計百餘里頃據雷正綰緘報又接獲
勝仗卽係此股卻未敘及金順張曜等剿賊情形容卽
查明馳

奏至金運昌九月二十三日已抵甯條梁郭寶昌前報

九月十九日病痊起程前往合隊臣於十月十二日欽奉

寄諭飭郭寶昌歸李宗義調遣當卽飛檄遵照續據郭寶昌十月初六日稟已由清澗進發竊計此時已行近花馬池一帶若再令其回赴山西往返二千餘里徒滋勞費臣又飛檄郭寶昌自行酌奪覆侯具奏請

旨郭寶昌金運昌異姓兄弟各有其長郭寶昌爽直奮勇而紀律難言英翰又多收降捻交其統帶故此次入關以來地方甚受其累金運昌人尙樸實講求紀律而

英銳之氣不如郭寶昌兩者相需而行離之則兩害伏
怨

聖明指示如郭寶昌實已行近花馬池可否無庸折回
山西之處出自

聖裁至山西冬防實須早爲准備李慶翱斷非勝任之
人臣前此劾奏李慶翱均有實據鄭敦謹以臣前奏中
有魚緣一語疑臣爲暗含譏切則誤會也鄭敦謹本臣
三十年前舊交臣深知爲介慎君子豈有違心譏切之
理況敢以不實之詞妄陳於

君父之前乎臣於李慶翱自可毋庸再加糾劾致啟論
端然山西河防若恃李慶翱必至貽誤臣既心有所知
不敢不以上

聞伏乞

聖鑒謹

奏 同治八年十月十九日

軍機大臣 同治八年十月二十六日奉

上諭左宗棠奏劉松山一軍續獲勝仗暨各軍剿回獲
勝並覆陳靈州現在情形郭寶昌毋庸折回山西各摺

片覽奏均悉陝回經官軍擊敗後竄踞顧家寨等處劉
松山督軍進剿馬化澂屢以求撫爲辭而賊中修寨掘
壕並未少息該軍自八月二十九日至九月十九日疊
破顧家寨馬家寨各處賊壘並斬賊目毛遂生等多名
現在陝回已去金積堡賊勢甚孤惟馬化澂陰蓄詭謀
每以乞撫爲緩師之計若不痛加剿擊爲患更深劉松
山所謂花定後路四營計已早到著卽飭令該提督乘
此聲威合隊追剿毋任該逆從中勾結日肆蔓延如有
真心悔罪赴營求撫者亦著該提督相機辦理所有疊

次陣亡之副將李洪吉參將李明發游擊李三元都司
易其友鍾綿堂陳志林守備陳炳煒袁洪輝徐玉武李
華富張桂馥丁楚賢千總劉友文把總潘宗德龍桂益
劉貴發均著交部照所保官階從優議卹黃鼎雷正綰
等軍在新堡子等處各獲勝仗殺賊甚多賊由狄道向
河州竄去現在赴省驛道已通著該大臣卽飭黃鼎等
分投扼紮遏賊回竄之路其蘭垣防剿事宜並著妥籌
兼顧回人李百寬等該大臣仍當檄令曾傳理分別妥
爲安撫靈州降回變亂現已收復查非劉松山濫殺所

致著毋庸議副將謝榮華等下落並著查明辦理刻下黃河水結山西河防更爲緊要該大臣既以李慶翱爲不足恃則郭寶昌赴晉之行尤不可緩著卽檄飭該提督酌帶親兵迅赴山西金運昌已督軍抵甯條梁並著飭令迅速前進與劉松山軍會埽賊氛毋稍濡滯將此由六百里諭令知之欽此

北路官軍收復靈州攻克堅寨摺

奏爲北路官軍克復靈州城池攻克堅寨連獲大捷據實馳陳仰祈

聖鑒事竊劉松山一軍八月二十九日至九月十九日
續破寨壘連獲大捷實在情形臣已於十月十九日馳
報其時已據道員曾傳理絨告得劉松山信知九月二
十三日克復靈州城並破四寨一壘十月初一日攻克
里仁渠一帶九寨前於遵

旨覆陳摺內約畧敘及然未接劉松山公牘故戰狀不
能詳茲據劉松山牘稱九月二十二日馬化澂復遣漢
民解米糧十萬斤來營具保馬化澂永無反覆狀仍不
言呈繳馬械劉松山以撫局關鍵首在呈繳馬械今馬

化隆仍襲從前故智冀以甘言微利了事非誠心求撫可知察看金積堡東北馬家兩寨楊家寨金何李丁四寨雄峙參錯深濠環繞渠流滿注其中距提督蕭章開劉家營壘五里是夜劉松山傳令各營携鋤鋪草束四鼓出隊向劉家寨取齊馬步分五路布壘陣銜枚夜行一向馬家寨進一向楊家寨進各支列陣於後以拒各堡援賊比抵寨前賊始驚覺官軍號鼓齊鳴登將各寨合圍寨上礮石雨下各營擲草平壕揮鋤掘堡併力攻之火器環施飛光電轉大明楊家寨積薪著火煙燄蔽

空寨中呼號喧噪壯士乘機猛進一鼓克之馬家兩寨
見楊家寨已破恟懼益甚各營復乘勝薄之兩寨亦相
繼而下劉松山比溥令各營進攻李丁金何四寨察看
李丁兩寨地勢低窪溝渠交錯飭各營運蘆葦築壩蓄
水灌之未幾金積堡馬步援賊盡至劉松山自督各營
穩築壩隄派道員劉錦棠提督蕭章開軍功董福祥分
中左右三路擊之提督李占椿李雲貴爲接應提督潘
運璋陳宗蕃進左路之左提督彭緒所譚上連進右路
之右各營奮衝殺賊勢不支折而西奔官軍馬步急

追至秦渠邊賊中人馬擁擠橋梁忽斷殿後之賊見水而過戮斃溺斃無算餘賊向金積堡遁去各營返旗攻李丁兩寨渠水已淹逼堡脚矣寨賊勢蹙開西門出奔金何兩寨賊眾亦倉皇棄巢鼠竄官軍分支抄殺斃賊又多餘賊敗歸金積堡劉松山卽令官軍分營填駐所破五寨收隊而旋是役計殺斃焚斃回逆約一千五百餘名回目馬王喜已於堡破時格殺生擒百餘名內有回目馬得三當卽訊明正法奪獲騾馬五百餘匹拾器械無數官軍陣亡員弁勇丁二十七名受傷一百七十

一名此九月二十三日攻克劉家寨西北寨壘七座大
獲勝仗情形也是日吉林馬隊及留駐花馬池定邊四
營來下橋會師詢悉提督黃萬友副都統雙壽於十六
日道出橫城時適探南路有騎賊駛到意似迎抗官軍
黃萬友督飭步隊雙壽督馬隊張左右翼迎擊馬賊結
數十團猛撲而來氣殊驕甚官軍併力壓擊鎗破刀矛
齊進賊敗退迨逐十五里始行收隊計斃賊二百餘名
奪獲戰馬五十餘匹器械甚夥官軍陣亡勇丁十名受
傷十二名劉松山以該逆於竊踞靈州後因官軍未加

懲創自謂得計此次仍敢截阻後路之師應予痛剿二
十四日先諭馬化澂令靈州踞城叛回速出就撫免其
剿辦二十七日馬化澂始具稟來營仍請寬限劉松山
知其詐嚴飭之訓靈城賊留精壯守城並引陝回入城
助守其眷屬輜重則已於先日潛移金積堡矣二十九
日五鼓劉松山傳令各營裹糧夜起仍分五路布疊陣
整隊向靈州進架橋過清水溝行數里時已午刻瞭見
城南卡壘甚堅賊旗林立左右野潦縱橫淺者猶及馬
腹劉錦棠蕭章開分左右路鳧水而進劉松山督各路

直擣中堅抵城南五里圓圓寺卡各營鎗礮仰轟拔去
蒺藜架木爲橋踰壕而上克其外卡餘賊向南門外里
許之石壘竄遁官軍緊躡之忽城東塵氛大起突出馬
賊千餘向西南馳突意圖抄截劉松山飭提督余虎恩
馬隊擊其左雙壽馬隊擊其右董福祥步隊副之騎賊
撲近陣前官軍馬步相依縱橫盪挾斃悍賊數十名敗
賊折向東南飛奔各營追殺十五里維時劉錦棠蕭章
開已抄近附城之卡壘旁矣城賊開南門出卡拚死拒
敵劉松山飭黃萬友周國勝朱德開李就山知州李樹

崇奮力圍攻城南石壘自督陶實昇易致巾何作林譚拔萃從中路猛進鎗礮環攻雷轟電掣賊勢不支爭入卡門拋棄器械自相蹂踐劉錦棠肅章開乘勢奪卡而入敗賊縮退城中各營躡蹤搶入見賊卽斫城賊開東北兩門狂竄官軍分道躡之追殺五里天色已向晚矣收隊回城其南門外石壘踞賊二百餘名經黃萬友攻破擒斬無遺是役實斃賊一千四百名生擒二百七十三名訊明賊目馬元生馬致和郭有利正法軍前拔出漢民男婦七百餘名奪獲騾馬千餘匹器械千數百

件官軍陣亡員弁三十一名受傷一百八十一名此二十九日克復靈城大獲勝仗實在情形也是夜調靈城敗賊踞城東迤南十里之海子墩買家莊十二里之馬清兒羅家橋四寨劉松山留營駐防親督各營四鼓出隊派劉錦棠蕭章開向海子墩進自督各軍向買家莊進飭馬隊伏左右兩路並戒步隊如未破寨則列隊勿動也部署既定軍士銜枚疾行直薄寨下賊始驚覺中軍搥鼓發號火器仰攻寨上亦礮石雨注軍士擲草掀土填濠而過焚塞門掘堡腳四面擁登立將海子墩買

家寨攻克該兩寨回逆四五百名悉數殲之其馬清兒
羅家橋兩寨踞賊見火光如晝喊聲震地礮轟如雷知
官軍已奪海子墩買家寨矣遂開堡門從東南狂竄余
虎恩雙壽馬隊左右抄殺之壓追十八里收隊而還是
役斃賊六百餘名生擒四十二名訊畢於軍前正法拔
出漢民男婦二百餘名奪獲騾馬三百餘匹器械多件
官軍陣亡弁勇十四名受傷五十八名此三十日攻破
靈州城外四寨獲勝情形也劉松山進城後察看城內
倉廩廟宇官廨民廬半成灰燼瓦礫塞道飭黃萬友李

樹棠移兩營駐之將節次拔出漢民安插州城設法撫輯一面招徠漢民認產復業初一日自率馬步各軍收回下橋老營營東十里爲里仁渠大小兩寨迤西兩莊迤北里許爲趙家寨迤東二里爲楊家三寨楊家寨迤北三里許爲馬家兩寨賊踞其中劉松山是夜傳令各營四鼓出隊分枝向里仁寨趙家寨進自督中軍相機而動令馬隊伏東南二三里防西南援賊劉錦棠蕭章開抵里仁寨半里守賊見官軍至大寨礮聲起小寨之賊倉皇出巢螳附大寨各營乘勢跟踪奪門而入賊眾

死鬥鎗礮對轟壯士從寨後肉薄而登寨內之賊狂號
出奔官軍一鼓擁入寨門敗賊無路可逃有墮牆而殞
者有投井而斃者守賊約四五百名蒐殲盡淨劉松山
乘勝督各營進楊家三寨令朱德開李就山董福祥圍
趙家寨拔之守寨之賊約三四百名僅逸出馬賊數十
騎餘盡殲旗楊家三寨之賊見各寨火起開門向正東
狂竄陶之昇易致中何作霖周國勝兩路抄殺之逼入
山水溝淹斃戮斃無算餘逆折回東南敗走天色已明
忽西南塵氛蔽空突有騎賊二千餘來勢兇猛劉松山

派劉錦棠蕭章開督隊進正東攻馬家兩寨自督步隊
攔頭迎擊傷馬隊左右抄之悍賊死拒不退適馬家寨
之賊經官軍攻破紛紛出寨亂竄賊眾返顧忙亂亦向
西南潰走各軍四路掩殺陣斬步賊三百餘名收隊而
還是役其計寔斃賊一千數百名生擒一百一十一名
內有賊目趙蔞辣馬幅意訛畢軌之奪獲牲畜器械不
可數計官軍陣亡員弁勇丁十八名受傷九十四名此
十月初二日攻克里仁渠大小八寨兩莊之實在情形
也方劉松山前月二十九夜之入靈州也馬化澂來稟

靈回正在出城忽有南來陝回乘閒進城焚掠請示邊
辦并央派辦撫局之總兵胡昌會請於甯郡五屬擇地
安插意在飾其勾結之謀不意劉松山九月二十三日
破馬家寨時已搽出馬化澀九月十三日給偽參領馬
三重吳天德楊長春糾黨抗拒偽札一封偽銜刻統理
甯郡兩河等處地方軍機事務大總戎馬鈴以偽印其
狂悖之狀陰狡之謀已經敗露也陝回陳林馬鎮和等
股及從前雜匪金積堡之鄒保和沙學德等據雷正綰
等馳報初七日又經劉松山痛剿勒令悉數呈繳戰馬

軍械尙未接據劉松山馳報其雷正綰周蘭亭初八日由四百戶馳抵鳴沙洲訶張恩堡東西四堡爲馬化澂先鋒袁希孟所踞初九日兩軍整隊齊進先攻東西依崖兩堡破之斃賊二三百名釋其老幼婦女獲戰馬六十餘匹袁希孟卽率西面三堡回眾伏地泣懇收撫願將馬械悉數呈繳雷正綰等受之正黠驗間忽見賊騎數百急馳而西雷正綰等列隊堵截賊不意大軍倏至駭懼失措官軍馬步急擊之斃賊約二百名奪戰馬三十餘匹訊擒賊供始知此股卽馬鎮和馬長順之黨初

七日經劉松山擊敗者也初十日雷正綰由張恩堡進
滾泉進疊水適簡敬臨張福齊兩軍東自鞏州前來合
隊十二日行過强家沙窩擇要分駐秦渠內外距金積
堡皆不過十餘里臣以剿撫機宜未可遙制必事權歸
一乃策全功檄雷正綰周蘭亭簡敬臨張福齊所部各
營進止緩急次第均候劉松山商酌定奪冀免歧悞所
有劉松山一軍打仗陣亡之記名總兵楊玉賢補用參
將趙盛國陶昭福補用游擊杜雲龍補用都司張貞吉
拔補守備謝福有李應有拔補千總許育萬劉占魁唐

國政何義勝拔補把總鄧寶得張先發周升祥周以則
等實係血戰捐軀應均請

旨飭部各照官階從優議給

卹典以妥忠魂而昭激勸謹會同幫辦陝甘軍務署陝
西撫臣劉典合詞馳陳伏乞

皇太后

皇上聖鑒訓示施行謹

奏

同治八年十月二十六日

要隘是夜訓賊踞江口刺壩兩處湯聘珍督同梅開泰
倍道出禮縣截其北竄之路詰朝偁先宗馬步向刺壩
追賊至碧玉河突有另股伏賊橫出山谷之旁傅先宗
卽飭喻正祥督隊分途猛擊賊遂披靡喻正祥追殺二
十里至立堤壩傅先宗自督馬步追殺三十餘里至廟
兒壩敗賊向岷屬炭廠遁人狄河各軍收隊而還計初
一初二兩日斃賊約近千餘名生擒六十餘名奪獲騾
馬軍械無算查點官軍陣亡哨弁花翎守備楊宗英一
員受傷勇丁四名此九月二十五日至十月初二等日

湯聘珍傳先宗各軍剿賊獲勝之情形也據擒賊供此
股賊目劉四花鄉約馬元和世輔張老五皆西禮叛回
糾衆二千餘人流入狄河河州賊目馬尕大助以馬步
千餘沿途得夥結遊勇于餘衆意圖襲踞禮縣以自固
二十五日之戰花鄉約馬元已被鎗傷訛畢斬之其時
道員李耀南一軍已抵通渭馬營監十月初一日李耀
南誦通渭屬之李家灣一帶有河州回逆煽集攻堡掠
糧賊目爲甯阿洪馬洪福糾合北路敗回由狄道隴西
漳縣榜羅鎮竄來約三四千衆初二日黎明李耀南會

商署馬督監遊擊李孔英等帶兵數十名作嚮導派總兵殷華廷率馬隊前驅自率馬步各營繼進行二十里抵牛山遇賊前隊殷華廷擊敗之官軍追近李家灣城回旗抗拒分股從李家灣南北兩溝抄出李耀南飭副將盛照魁總兵黃儲寶蕭賞謙副將姜鳳興各率所部緊結方陣分中左右三路應之自督總兵周顯明知縣胡嗣曾率隊策應殷華廷怒馬陷陣盛照魁繼之黃儲寶蕭賞謙姜鳳興張左右翼乘勢猛進殺賊二百餘名賊且前且却拚死拒敵酣戰逾時周顯明督隊橫擣中

堅殷華廷馬隊斜出而南要賊歸路賊大潰各軍乘勢
壓擊斃賊三百餘名跟追至通安驛敗賊向內官營遁
去月股騎賊自北路來援復經胡嗣曾督隊擊敗是役
斃賊五百餘名生擒三十餘名陣斬逆目馬恆福甯阿
洪負創而遁奪獲騾馬軍械甚夥拔出難民數百名收
隊回馬營監官軍陣亡六名此十月初二日李耀南剿
賊獲勝之情形也臣維狄河回逆負隅恃險廣行勾結
此次糾約出巢自係迎護陝回崔三禹得彥敗殘餘黨
業經官軍擊敗遁歸巢穴臣穆圖善前調傳先宗進規

河狄臣宗棠已催令遵檄前進恪遵調遣並嚴飭南路
在防諸軍相機堵剿力顧後路此次剿賊疊獲勝仗在
事出力各員弁兵勇可否由臣等擇尤彙保出自

天恩至陣亡之都司唐治能王振清守備楊宗英于總
李集成擬保把總高齡均係力戰捐軀應請

旨飭部各照官階議給

卹典以慰忠魂所有南路各軍迎剿河狄出竄逆回疊
獲勝仗情形謹會同幫辦陝甘軍務署陝西撫臣劉典
合詞馳味伏乞

皇太后

皇上聖鑒訓元施行再此摺係臣宗棠主稿合併聲明

謹

奏 同治八年十月二十六日

知州尹泗等死事情形片

再臣前令劉松山查明靈州會否失陷文武員弁如何下落詳細開報以憑入奏茲據劉松山牘稱克復靈州後詢知該州甘回素聽馬化澂之命地方公事及征收錢糧同皆馬化澂主政在城文武各官薪糧皆由馬化

濫發給回眾貌視官長而不受約束官長坐視回眾而
莫可如何以致倉卒變生莫能救護前代理靈州知州
尹泗其弟藍領即選從九品尹漆並眷屬家丁十餘口
及現署靈州知州甘肅候補同知鍾蘭其子鍾爾規同
時服毒自盡前派去護餉之總兵曹加正副將陳明遂
辦糧委員副將陳永錫謝明華張福星彭友亮參將張
細祿副將王榮華隨去勇丁七名均被戕害當州城未
陷之前署靈州營參將馬福壽備李繡春州吏目黃廷
輝等察知回眾叛形已露約同出城赴營送信求援該

參將等復於途中遇賊守備李緒春不知下落此次克復州城卽派馬福黃廷輝作爲前導臣維靈州甘回本馬化濬黨夥馬化濬從前召雖就撫實仍以其新教部勒甘回自成一類久之老教亦被其脅服陝甘回民尊之爲主自稱爲吾兩目蓋回語奴才也其私授僞官有參領協領等名其自稱爲大總兵稱官軍爲敵人狂悖如此現因攻破甘回寨壘搜獲賊中僞文始知其詳劉松山前抵靈州恩恩南下未據該文武等稟知逆情誤將軍餉寄頓城中僅派弁勇十餘名守護以致回遭其

難現經官軍攻克州城逆賊殲滅殆盡死事諸文武應
懇

天恩加以旌卹前代理靈州知州尹泗卽選從九品尹
溱署靈州知州甘肅候補同知鍾蘭及劉松山派去護
餉辦糧之提督銜四川補用總兵曹加正江西補用副
將陳永錫補用副將謝明華推補副將陳明遂王榮華
張福星彭友亮副將銜補用參將張細祿均請照陣亡
例議給

卹典以妥幽魂署靈州營參將馬福吏目黃廷輝聞變

出城求援嗣導官軍克復城池可否免其置議出自
天恩謹附片具陳伏乞

聖鑒訓示施行謹

奏
同治八年十月二十六日

陳明進駐平涼片

再頃接劉松山緘稱因陝回呈繳馬械遲延仍懷叵測
初七日進剿連破秦渠南板橋馬家兩莊納家三寨丁
家兩寨劉家灣子三莊馬家灣子四莊何家兩莊西至
蔡家四寨金家兩莊一帶陝回所踞村莊斃賊二千餘
名生擒近三百名獲賊眷六百餘口奪騾馬九百餘匹
軍械無數官軍亦有傷亡馬化澂現央署河州鎮總兵
胡昌會保其永不反覆並力保陝回悉數呈繳馬械其
詳細情形容俟續報到日再行馳

奏臣拜摺後卽進駐平涼謹附片陳明伏乞

聖鑒謹

奏同治八年十月二十六日

易德麟病故請卹片

再記名提督格洪額巴圖魯易德麟隨同廣東提督劉松山攻勦靈州屬吳忠堡一帶回逆八月初六至二十八等日屢獲大勝情形臣已於九月二十五日恭摺馳報並將提督易德麟左乳受抬鎗子傷甚重聲敘在案嗣於十月初一日准劉松山牘稱易德麟因傷重醫藥

剿效於九月初四日身故查記名提督易德麟沈毅樸
訥勇畧過人與劉松山同爲前湖南已故道員

賜諡壯武王鑫舊部後隨劉松山轉戰兩湖兩廣江西
福建江南等省戰功卓著游保記名提督

賞換清字勇號上年捻逆北竄臣督師追勦該提督隨

劉松山轉戰陝西山西直隸山東每戰身先士卒所向
先捷事平敘功蒙

恩賞穿黃馬褂該提督旋以父母年近八旬更鮮兄弟
從軍十六載定省久缺請假回籍養親臣因西事方急

令俟陝甘軍務稍定再行給假劉松山以所部二十餘營分統需才令其別將五營自當一路去冬渡河以來剿辦回土各匪收撫董福祥股眾十餘萬勞績尤多臣擬懇

恩優獎尙未入

奏此次進攻靈州吳忠堡一帶逆回晝夜鏖戰連破寨壘數十當機勢順利之時竟以傷重殞命實堪痛惜之至合懇

天恩飭將記名提督格洪額巴圖魯易德麟照提督陣

亡例給予

卹典並懇

賜諡

恩准建祠湖南湘鄉縣原籍及甘肅靈州地方以妥忠魂而昭激勸伏乞

聖鑒訓示施行謹

奏

同治八年十月二十六日

令周開錫總統秦州各軍摺

奏爲甘肅南路兵事餉事整理需才現派周開錫馳赴

秦州總統諸軍以裨全局仰祈

聖鑒事竊甘肅地處邊荒幅員遼闊回逆變亂以後干里蕭條惟秦州昆連川陝僻在一隅稍稱完善近年以來協餉之來專取道於此重兵亦翕聚其閒其始藉兵力以護餉藉民力以養兵其繼兵增而餉愈艱民窮而寇愈熾臣自陝西肅清率師規隴卽派員外郎銜中書科中書吳士邁道員湯聘珍李耀南各率所部由汧隴趨秦州會同甘軍隨時堵剿一面諭知甘軍各將領裁併成營以期實濟提督梅開泰首先遵辦裁十營併成

五營總兵敖天印繼之察看情形事體尙無滯碍如果
辦理得宜未嘗不可收餉節兵精實效特一時乏此鉅
款既虞遺撤爲難而主持苟非其人轉恐激成別故所
夕焦思苦無全策適因商詢船政事宜致書前江西撫
臣沈葆楨及船政提調前護福建巡撫署福建布政使
周開錫附及隴事施措之宜沈葆楨以船政粗有端緒
商令周開錫西來助臣辦理周開錫以鉅款難措卽商
之閩浙廣東會與臣其事官紳於協餉中催提巨款不
足則稱貸益之共湊銀六十萬兩周開錫親自帶解親

銀二十萬其四十萬兩則由山西票商定期匯兌周開
錫行抵鄂省卽單騎馳赴臣營詢商一切臣維甘肅北
路中路均有制賊之軍南路雖有穆圖善與臣撥派之
軍而彼此勢分等夷各不相下非得治軍之才假以事
權難期指臂相聯其襄捷伐周開錫爲臣舊日舉徒知
之有素胡林翼會國藩李續宜常函稱之臣蒙
恩擢撫浙江受

命傾覆之時周開錫辭會國藩來浙其時已官知府矣
臣因賊陷漳龍閩疆苦急率師赴閩周開錫又隨同來

閩其時已升浙江糧道

臣奉

命調督陝甘時周開錫已開延建邵道缺署福建藩司
英桂接署督篆奏請護理巡撫臣去閩時以製造輪船
爲當務之急堅屬周開錫助沈葆楨經理必期其成嗣
因後任惑於浮議必欲改臣所爲遂併周開錫撤之沈
葆楨始委爲船政局提調其人性情真摯志慮忠純兼
通方略臣敢保其斷不營私殖利以誤

國家倘有過犯臣願坐罪現已檄令馳赴秦州總統諸
軍將南路兵事餉事認真整頓以資督助理合專摺陳

明伏乞

皇太后

皇上聖鑒訓示謹

奏

同治八年十月二十六日

同治八年十一月初五日內閣奉

上諭前因左宗棠奏提督劉松山剿辦靈州回匪連獲大捷請將該提督前此失察游匪一案革職留任處分懇恩開復等情當經諭知該大臣俟查明靈州失守情形後再行降旨茲據金順奏稱劉松山到靈州後剿撫

兼施現已將州城克復剿辦甚爲得手等語與左宗棠所奏大略相同劉松山向來打仗甚稱得力此次剿辦靈州回匪尤能速赴戎機謀勇兼備劉松山著准其開復革職留任處分其前案內失察之分統營哨各官均皆隨同打仗著有微勞著一併免其查參此外出力各員著准由左宗棠擇尤保獎毋許冒濫欽此

軍機大臣 字寄同治八年十一月初五日奉

上諭左宗棠穆圖善奏官軍疊剿河狄竄回獲勝請將出力陣亡各員并獎卹左宗棠奏北路官軍克復靈州

請將總兵楊玉賢等優卹並知州尹泗等陣亡情形及
進駐平涼令周開錫總統秦州各軍總兵易德麟病故
請卹金順奏剿辦甯夏南路踞逆獲勝請飭山西添撥
協餉並查明劉松山收復靈州情形各摺片覽奏均悉
本日已明降諭旨開復劉松山前案處分並將總兵王
連三等獎敘總兵易德麟副將李大勝等分別優卹矣
甘肅狄河回逆糾合陝回崔三等餘黨出巢肆擾經穆
圖善派傅先宗進剿獲勝左宗棠又檄李耀南等軍敗
賊於李家灣帶斬獲甚多其甯夏南路回匪楊士恭

等勾結陝回援應納王各寨又經金順張曜督軍迎剿
疊獲勝仗剿辦均屬奮勉現在陝境肅清各匪已無立
足之處勢必要挾甘回苟延殘喘如能將河狄各賊巢
逐一攻破斷其黨援則剿撫皆易得手著左宗棠仍飭
李耀南等及前派出之黃鼎各軍乘機進剿毋稍鬆勁
一面嚴檄南路在防將士實力嚴防以免顧此失彼穆
圖善當札飭傅先宗等與陝軍聯絡聲勢迅掃逆氛納
王各寨爲回逆負固之區仍著金順會同張曜迅圖攻
拔毋任憑險死守阻絕官軍所有迎剿河狄回匪陣亡

之都司唐治能王振清守備楊宗英千總李集成擬保
把總高齡均著交部各照官階議卹出力員弁准由左
宗棠穆圖善擇尤彙保左宗棠奏查明靈州失陷文武
下落情形請將各員議卹免議等語代理靈州知州尹
泗卽選從九品尹漆署靈州知州甘肅候補同知鍾蘭
及總兵曹加正副將陳永錫謝明華陳明遂王榮華張
福厚彭友亮參將張細祿均著交部照例議卹署靈州
參將馬福吏目黃庭輝旣據奏稱聞變求援並導官軍
克復城池情尙可原馬福黃庭輝均著免其置議其劉

松山收復靈州情形與金順所奏大略相同該大臣現
擬進駐平涼著卽懷遵前旨將能否馳赴蘭垣情形迅
速具奏同日馬化澂既給與馬三重等傷札是其狂悖
之情業已敗露而又求總兵胡昌會保其永不反覆並
力保陝回呈繳馬械前後兩歧殊難憑信卽著該大臣
嚴飭劉松山等乘此軍威迅圖掃蕩該逆如實係真心
乞撫仍著左宗棠責成劉松山相機妥辦萬不可爲甘
言所誘輕率收撫轉遂奸謀周開錫既馳赴秦州派令
總統諸軍卽著檄飭該道員將南路兵事餉事認真整

賴以資臂助北路剿撫事宜著卽檄知雷正綰等與劉松山商推以免分歧劉松山所部陣亡之總兵楊玉賢參將趙盛國陶昭福遊擊杜漢龍都司張貞吉守備譚福有李應有千總許育萬劉古魁唐國政何義勝把總鄧寶得張先發周陞祥周以則均著交部照各保官階從優議卹金順所奏添撥協餉本日已諭知李宗羲照數撥解矣將此由六百里各諭令知之欽此